



**Ikalimang Dominggo  
sa Pagkabanhaw  
May 18, 2014**

**Ma-Dominggong Tamdanang Liturhikal alang sa  
Simbahan sa Kabus sa Diwa sa Bag-ong Ebanghelisasyon**

**A**ng Simbahan sa Kabus, pinaagi sa Gagmayng Simbahanong Katilingban, makanunayong magkahiusa ug mabahandianon tungod sa mga panaglahi ug mga panagbanging nasinati isip bag-ong balay-alampoanan sa Diyos kansang katapusang padulngan mao ang pagpuyo uban sa Amahan pinaagi sa gugma ug pagtahan sa kaugalingon dinhi sa yuta.

Sa mapadayonong pagtagamtam sa kalipay sa Pagkabanhaw tungod sa bag-ong kinabuhi nga gituga kanato sa atong Nabanhawng Ginoo, ipadayon usab nato ang pagpamalandong bahin sa panglantaw sa usa ka Simbahang Nabag-o nga seryosong gipadayag sa PKP-II, sa pag-ingon:

**(34)** “Molihok gayud kita padulong sa unahan. Tungod kay kana mao ang gamut sa atong Kristohanong identidad. Sumusunod kita ni Kristo, iyang mga disipulo. Sundon nato ang iyang mga tunob sa atong panahon – nga mahigugma sa iyang gugma. Nga mabuhi sa iyang kinabuhi. Mao gani nga kinahanglang molihok kita padulong sa unahan. Ang paghunong sa pagsunod kaniya pagluib sa atong pagkatawo.

**(35)** Ug busa ang pangutana mao kini: unsaon man? Unsaon man pagpuyo nga Kristohanon? Isip mga Pilipinhong

**RITO SA PAGSUGOD**

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Kalinaw sa Nabanhawng Ginoo maanaa kaninyo.

K: *Maanaa usab kanimo.*

Katoliko? Sa atong kahimtang nga adunay mga kahayag ug mga anino? Unsaon man?

Ang tubag dili mahimong abstrakto. Kay tultolan kita balik ngadto sa pagkatawo ni Kristo, si Jesus nga taga-Nasaret, nga gipanamkon pinaagi sa gahum sa Espiritu Santo ug gipakatawo ni Mariang Ulay. Si Jesus nga nagsangyaw ug nagmilagro. Nga gilansang sa Krus ubos ni Poncio Pilato, namatay ug, gikan sa mga minatay, nabanhaw pagbalik. Si Jesus nga karon nagapuyo sa tuo sa Amahan – apan ania gihapon nagpuyo taliwala kanato.

**(36)** Unsaon man pagpakabuhi isip mga Katolikong Kristyano karon? Paghibaló, paghigugma, pagsunod kang Kristo diha sa Simbahan nga iyang gitukod. Mao man bitaw nga kinahanglang mamalandong kita sa iyang panagway – ug sa kasingkasing ni Kristo. Kinahanglang atong isugid pag-usab ang iyang sugilanon nganhi kanato, aron mamahimo kitang mas toohan, mas adunay awtoridad, sa pagsugid niini ngadto sa uban. Mao kini ang atong pagtoo.”

Seryoso ug bug-at kini nga mga pulong gikan sa atong Simbahan. Ug uban sa maong gibug-aton ug pagkadinalian, atong ipalanog ang maong pangutana nganhi kanato ■ g sa inyong GSK: Unsaon man?

## **Pasiuna ug Pag-abi-abi**

Mga minahal kong mga igsoon: ipadayon nato ang pagtagamtam sa kalipay sa Pagkabanhaw ug sa bag-ong kinabuhi nga gigasa kanato sa atong Nabanhawng Ginoo. Iampo nato ang matag-usa nga mabuhong kita sa panagkadaiya sa atong mga pamaagi sa pagpakabuhi, sa panghunahuna ug sa pagtoo. Ug sa maong paagi matagamtam nato ang pagkamanggihatagon sa gugma sa Diyos alang kanatong tanan.

## **Akto sa Paghinulsol**

P: Mga igsoon, atong pangayoon karon sa Diyos ang iyang pasaylo sa atong mga sala, aron mahimo kitang takus sa pagsaulog niining mga balaang misteryo.

P: Ginoo, pasayloa kami kay sa makadaghang higayon mibatok kami kanimo. Ginoo, kaloy-i kami.

*K: Ginoo, kaloy-i kami.*

P: Kristo, tabangi kami sa panahon sa mga duda, kawalay-pagtoo ug kagahi sa kasingkasing. Kristo, kaloy-i kami.

*K: Kristo, kaloy-i kami.*

P: Ginoo, ipakita kanunay kanamo ang dalan balik nganha kanimo ug sa Amahan. Ginoo, kaloy-i kami.

*K: Ginoo, kaloy-i kami.*

P: Kaloy-an unta kita sa Dios...ngadto sa kinabuhing dayon.

*K: Amen.*

## **Himaya sa Diyos didto sa langit...**

### **Kolekta**

P: Mag-ampo kita: Labawng makagagahum ug buhi sa kanunay nga Diyos, hingpita sa kanunay dinhi sa among kahiladman ang Misteryo sa Pasko, nga kadtong imong gikahimutang mabag-o diha sa Santos nga Bunyag, ubos sa mapanaliporon mong pag-amoma, magbunga unta ug daghan ug makadangat ngadto sa mga kalipay sa kinabuhing dayon. Pinaagi sa among Ginoong Jesukristo, imong Anak, nga buhi ug hari uban Kanimo diha sa kahiusahan sa Espiritu Santo, Dios nga

usa, hangtud sa kahangturan.

*K: Amen.*

## **LITURHIYA SA PULONG**

### **Unang Pagbasa: Buhat 6:1-7**

L: Ang pagbasa gikan sa Mga Buhat sa mga Apostoles.

(Basahon gikan sa Kasulatan)

L: Ang Pulong sa Ginoo.

*K: Salamat sa Dios.*

### **Komentaryo sa Buhat 6:1-7:**

Ang komplikado nga kahimtang sa unang Kristohanong katilingban hinayhinay nga nabutyag karon, human sa ideyal nga paglarawan ni Lukas. Tingali ang mga Helenista mao ang mga Griego ug mga Judiyong nahimong Kristohanon nga nanagpuyo isip katilingban sa langyawng kayutaan (diyaspora), nga Griego ug sinultihan ug Griego usab ang ilang pamaagi sa pagpuyo, ug busa tigsaway sa mga tradisyonal ug konserbatibong mga pamaagi sa pagpuyong Judiyo. Ang mga Hebreo mao tingali kadtong mga Judiyong na-Kristyano, ug ang ilang sinultihan Aramayko ug ang ilang estilo sa pagpuyo Hebraiko, ug niining pundoka nahisakop ang kadaghanan sa mga apóstoles. Tungod sa ilang Judiyong kagikan, ang ilang pagpakabuhi mapihigon, usa ka bug-at nga hiyas nga lisud matalikdan. Mao man bitaw nga ang mga Helenista mireklamo bahin sa kakulang sa pag-alagad sa ilang mga biyuda. Apan sa mas halawom nga pagtuki, ang suliran mao kini: unsaon sa pagpabiling nagkahiusa taliwala sa mga panaglahi. Hilabihang bug-ata niining sulirana nga nakatukmod sa pagpatawag ug kinatibuk-ang panagtigom. Ang sulbad: pilion ang 7 ka mga diyakono nga mga Helenista! Apan usa kanila si Nikolas nga taga-Antiokiya, pagano ang kagikan, nasakop sa Judaismo ug karon Kristyano na! Aduna ba kahay kaangayan tali kanilang mga Helenistang Judiyong Kristyano,

Judiyong Kristyano, Paganong nasakop sa Judaismo nga nahimong Kristyano? Sa pagpatong sa mga kamot, gipadayon ang tradisyong biblikal: ang pagpaambit sa Espiritu Santo. Busa, ang Espiritu Santo dili monopolio sa hierarkiya sa Simbahan lamang, ni sa bisag-unsang Kristohanong pundok. Hinooa mohuyop siya sama sa hangin sumala sa iyang gusto. Ang panaghiusa ug kabahandianon sa lokal nga Simbahan magpabilin ug mapabuhong pa pinaagi sa kasinatian sa panagbangi ug mga kasulbaran niini.

**Salmo Responsoryo: Sal 33:1-2, 4-5, 18-19**

*(Basahon gikan sa Kasulatan)*

### **Komentaryo sa Sal 33:**

Naghimo ug musika ang salmista sa pagdayeg ug pasalamat sa Diyos, tungod kay ang pulong sa Diyos mamugnaon ug siya kasaligan. Gitubag sa Ginoo ang panginahanglanon sa salmista: ang hustisya ug kalooy. Gibarugan sa salmista nga ang Ginoo makapalingkawas gikan sa kamatayon ug kagutom tungod sa iyang mahigugmaong kalooy ngadto kanila nga nahigugma ug naglaum kaniya.

### **Ikaduhang Pagbasa: 1 Ped 2:4-9**

L: Ang pagbasa gikan sa Unang Sulat ni San Pedro.

*(Basahon gikan sa Kasulatan)*

L: Ang Pulong sa Ginoo.

K: *Salamat sa Dios.*

### **Komentaryo sa 1 Ped 2:4-9:**

Matahom kaayo ang meditasyon ni Pedro bahin sa “bag-ong balay-alampoanan”: ang mga tumutuo kang Jesukristo mao ang mga batong gipatongpatong; si Jesus mao ang ilang buhing batong sukaranan. Sukwahi kini sa walay kinabuhing mga materyales nga naghimo sa templo sa Jerusalen. Alang kanilang midumili sa

pagtoo, kining bag-o ug buhing templo sa mga Kristohanon maoy babag nga makapandol. Kining bag-ong templo naghingpit sa bag-ong katawhan sa Diyos kansang mga hiyas mao man kadtong sa mga karaang katawhan sa Diyos: ang Israel – ang kaliwatang pinili, ang harianong pagkapari, ang balaang nasud, ang katawhang gilain sa Diyos!

### **Berso sa Aleluya:**

T: **Aleluya, aleluya.** Ako ang dalan, ang kamatuoran ug ang kinabuhi, nag-ingon ang Ginoo; walay makaduol sa Amahan, gawas kon pinaagi kanako!

T: **Aleluya, aleluya.**

### **Ebanghelyo: Juan 14:1-12**

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo Sumala ni San Juan.

K: *Himayaon ikaw, O Ginoo.*

*(Basahon gikan sa Kasulatan)*

P: Ang Ebanghelyo sa Ginoo.

K: *Daygon Ikaw, O Kristo.*

### **Komentaryo sa Juan 14:1-12:**

Ang katapusang padulngan ni Jesus ug sa iyang mga tinun-an usa ra: ang pagpuyo uban sa Amahan. Mata’g-usa kanila adunay lawak sa balay sa Amahan. Sama ra nga mianhi si Jesus aron ipakita ang dalan padulong sa Amahan, siya usab mobalik pag-usab aron dad-on sila uban kaniya ngadto sa katapusan ug komun nga padulngan. Mao nga si Jesus lamang ang tino nga dalan padulong sa Amahan: iyang gihatag ang kinatibuk-ang direksyon padulong nianang usa ra ka tumong nga komun: pagdapig sa kamatuoran ug sa kinabuhi subay sa kabubut-on ni Jesus. Apan sa mata’g-adlaw, mata’g-usa kinahanglang mohukom alang sa iyang kaugalingon kon unsay iyang buhaton aron mahasubay sa maong dalan, direksyon ug dapig sa kamatuoran ug kinabuhi nga gibut-an ni

Jesus. Niining maong diwa mahimo sa usa ang mga buhat ni Jesus, ug dugang pa, ang mata'g-usa sa iyang kaugalingong panahon ug luna sa kasaysayan. Ang nagkutay tali kang Jesus ug sa iyang mga tinun-an ug sa mga umaabot pang mga kaliwatan sa mga tinun-an ania dinhi: sama ra nga ang Amahan anaa kang Jesus, mao usab nga ang mata'g motuo kaniya, mata'g-tinun-an kinahanglang mahimong presensya ni Jesus alang sa tagsa-tagsa. Usa kini karelasyon sa panag-ambit sa usa ka identidad ug makasaysayanong panaghiusa sa kinaiya. Apan ang dalan ni Jesus, ang iyang kamatuoran ug kinabuhi maoy usa ka pagtahan sa kaugalingon ug pagpasakit isip timaan sa pagkatiunayng hingpit alang sa uban, alang sa hinigugma, bisan pag hangtud sa kamatayon!

**U**bani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang [gospelbreak.wordpress.com](http://gospelbreak.wordpress.com). o pinagi sa inyong smartphone o tablet i-swipe kini nga QR code.



Please help us continue publishing this Missalette with your donation.

Any amount is appreciated no matter how small.

Thank you!

Account Name:  
Communication Foundation for Asia  
Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:

SA# 7090-042-836

Please fax deposit slip to 713-2736

We are located at # 4427 Old Sta. Mesa St.,  
Sta. Mesa, Manila

**Wali: Ang Simbahan sa Kabus, pinaagi sa Gagmayng Simbahanong Katilingban, makanunayong magkahiusa ug mabandianon tungod sa mga panaglahi ug mga panagbanging nasinati isip bag-ong balay-alamponan sa Diyos kansang katapusang padulngan mao ang pagpuyo uban sa Amahan pinaagi sa gugma ug pagtahan sa kaugalingon dinhi sa yuta.**

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
<p>Ang Simbahan sa Kabus, pinaagi sa Gagmayng Simbahanong Katilingban, makanunayong magkahiusa ug mabandianon tungod sa mga panaglahi ug mga panagbanging nasinati isip bag-ong balay-alamponan sa Diyos kansang katapusang padulngan mao ang pagpuyo uban sa Amahan pinaagi sa gugma ug pagtahan sa kaugalingon dinhi sa yuta.</p>	<p>Unsa man ang inyong mga kasinatian bahin sa mga panagbanging sa natad sa kultura, pilosopiya ug teolohiya dinha sa inyong GSK? Giunsa man ninyo pagpabiling managhiusa ug bahandianon tungod niining maong mga kasinatian? Asa man kaha padulong ang huyop sa Espiritu Santo alang kaninyo karon?</p>	<p>Ang atong lintunganay nga destinasyon mao man ang pagpakig-uban kang Jesus ug sa Amahan hangtud sa kahagturan. Mokawos kita'g kusog ug kadasig nga mahigugma ug moalagad sa tagsa-tagsa pinaagi sa pagkaplag sa presensya sa Espiritu Santo sa mata'g pagkalahi ug pagkadaiya sa tagsa-tagsa. Kini timaan sa pagkamanggihatag sa gugma sa Diyos.</p>

## **Padayag sa Pagtoo**

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

## **Mga Katilingbanong Pag-ampo**

P: Mga hinigugma kong mga igsoon, malipayon kitang mohangyo sa atong Amahan ug mga grasya nga atong gikinahanglan sa pag-aninaw nato sa presensya ug lihok sa Espiritu Santo diha sa mata'g usa kanato, dinhi sa kalibutan ug sa mga panghitabo sa atong panahon. Sa mata'g pag-ampo, kita motubag: Ginoo, paduola kami kanimo pinaagi sa imong gugma.

**T: *Ginoo, paduola kami kanimo pinaagi sa imong gugma.***

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagtudlo kanato sa pag-ila sa presensya ug lihok sa Espiritu Santo sa mata'g-tawo, sa mata'g pamaagi sa pagpuyong tawhanon, sa mga butang sa atong palibot ug sa mga panghitabo sa atong panahon. Mag-ampo kita sa Ginoo.

**T: *Ginoo, paduola kami kanimo pinaagi sa imong gugma.***

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ila untang ipadayon ang pagpalambo

sa kahiusahan diha sa mga kalainan ug kalahi, ug ang pagwagtang sa diskriminasyon ug paghukom nga walay kamatuoran. Mag-ampo kita sa Ginoo.

**T: *Ginoo, paduola kami kanimo pinaagi sa imong gugma.***

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang mahatagan ug puluy-anan ang tanang mga tawo, mga migrante ug mga langyaw, uban sa halawom nga pagtoo nga ang tibook kalibutan iya sa Diyos ug angay lamang paga-ambitan natong tanan. Mag-ampo kita sa Ginoo.

**T: *Ginoo, paduola kami kanimo pinaagi sa imong gugma.***

L: Alang kanatong tanan, mga lumulupyo sa kalibutan ug sakop sa kalangitan: nga makaton unta kita sa pagtahud ug pagtamud sa mata'g usa diha sa atong mga panaglahi, ug magpaluyohay unta kita sa atong hiniusang paglawig padulong sa Amahan. Mag-ampo kita sa Ginoo.

**T: *Ginoo, paduola kami kanimo pinaagi sa imong gugma.***

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

**T: *Ginoo, paduola kami kanimo pinaagi sa imong gugma.***

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) .... Mag-ampo kita sa Ginoo.

**T: *Ginoo, paduola kami kanimo pinaagi sa imong gugma.***

P: Ginoo, mao kini ang mga pag-ampo nga among gihalad kanimo karon. Nangaliyopo kami nga imo kaming ubanan kanunay sa among pag-aninaw sa tawag sa Espiritu alang kanamong tanan, gawas ug sulod sa among mahal nga Inahang Simbahan. Kini among gipangayo pinaagi ni Kristo atong Ginoo.

**T: *Amen.***

## LITURHIYA SA EUKARISTIYA

### Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

*K: Daygon ang Dios hangtod sa kahangturan.*

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.’

*K: Daygon ang Dios hangtod sa kahangturan.*

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

*K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.*

### Pag-ampo Alang sa Mga Halad

P: O Diyos, nga pinaagi niining katingalahang pagbinayloay nga nahimo niining sakripisyo nagahimo usab kanamo nga mga tig-ambit sa usa lamang ka Diyos, nagaampo kami, nga, tungod sa among pag-ila sa kamatuoran, amo usab unta kining angkonon pinaagi sa takus nga pagpuyo. Pinaagi ni Kristo among Ginoo.

*K: Amen.*

### Prepasyo

P: Ang Ginoo maanaa kaninyo.

*K: Maanaa usab kanimo.*

P: Ibayaw ang inyong mga kasingkasing.

*K: Amo nang gibayaw ngadto sa Ginoo.*

P: Magpasalamat kita sa Ginoong atong Dios.

*K: Angay ug matarong.*

P: Angay ug matarung gayud, sibo ug makaluwas, kanunay ug sa tanang dapit apan **6**

ilabi na gayud niining panahona, O Ginoo, nga dayegon ikaw sa tumang paghimaya, kay si Kristo nga among Pasko nahalad na man.

Kay, sa pagkalaglag sa karaang kahimtang, ang unibersong nahitumpawak nabag-o na, ug ang kaligdong sa kinabuhi nahiuli na kanato diha ni Kristo.

Busa, puno sa kalipay sa pasko sa pagkabanhaw, ang mata’g yuta, ang mata’g katawhan nagadayeg sa imong himaya ug bisan gani ang mga gahum sa kalangitan, uban sa mga panon sa mga anghel, nagadungan sa pag-awit sa walay katapusan imno sa imong himaya, sa ilang pag-ingon:

### Santos

*K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.*

### Pag-ampo sa Eukaristiya

*(Human sa konsagrasyon, ang aklamasyon:)*

P: Kini ang misteryo sa pagtoo.

*K: Luwasa kami, O Manluluwas sa kalibutan, kay pinaagi sa imong Krus ug Pagkabanhaw, gihatagan mo kami’g kagawasan.*

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

*K: Amen.*

### Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

*K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon*

sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: *Kay imo man ang gingharian/ ug ang gahom ug ang himaya/ hangtod sa kahangturan.*

P: Ginoong JesuKristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: *Amen.*

P: Ang kalinaw sa Ginoo sa kanunay maanaa kaninyo.

K: *Maanaa usab kanimo.*

P: Ipakita ta ang atong panag-inigsoonay.

### **Kordero sa Dios**

K: *Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.*

### **Pangalawat**

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: *Ginoo, dili ako angay nga mokalawat kanimo, apan ipamulong lamang ug mamaayo ako.*

### **Pag-ampo Human sa Pangalawat**

P: Mag-ampo kita: Puno sa grasya, puy-i ang imong katawhan, nangaliyopo kami kanimo, O Ginoo, ug ug dad-a silang imong gitugahan sa mga langitnong misterio gikan sa karaang pagpuyo ngadto sa bag-ong kinabuhi. Pinaagi ni Kristo among Ginoo.

K: *Amen.*

### **Katapusang Panalangin:**

P: Ang Ginoo maanaa kaninyo.

K: *Maanaa usab kanimo.*

P: Moduko kita ug atong dawaton ang bendisyon sa Ginoo: Hinaut nga ang imong langitnong kahimuot, O Ginoo, mopadaghan sa katawhang mopaubos kanimo ug himoa sila kanunay nga masinugtanon sa imong mga sugo. Pinaagi ni Kristo among Ginoo.

K: *Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: *Amen.*

### **Pagpanglakaw**

P: Panglakaw kamo diha sa kalinaw.

K: *Salamat sa Dios. ■*

**Ang Simbahan sa Kabus,  
pinaagi sa Gagmayng  
Simbahanong  
Katilingban,  
makunayong  
magkahiusa ug  
mabandianon tungod  
sa mga panaglahi ug mga  
panagbanging nasinati  
isip bag-ong balay-alam-  
poanan sa Diyos kansang  
katapusang padulngan  
mao ang pagpuyo uban  
sa Amahan pinaagi sa  
gugma ug pagtahan sa  
kaugalingon dinhi  
sa yuta.**